




Sabtu, 12 Desember 2020

Luk. 10:34-35 bdk. Luk. 2:7



PENGINAPEN



Penginapen i bas bahasa Junanina, Pandoceion, ertina ingan ngalo-ngalo temue. Biasana adi kataken penginapen e isewaken, lit ikenaken biaya man si newsa. Adi si perdiateken kalak Samaria si nampati kalak si kena rampuk i pinggir dalan. I babana si kena rampuk e ku penginapen, iberekenna man pemilik penginapen e duit dua dinar. Sada dinar biasana cukup guna nukur nakan pangan sada jabu guna sada wari. Jadi, adi dua dinar berekenna e cukup guna keperlunna dua wari. Rumah penginapen e banci jadi sada usaha bisnis, emaka perlu tetap irawat ras ikelola alu mehuli gelah tetap lit minat kalak guna nginap ku je.

Seri kin penginapen si ituriken i bas kalak Samaria e ras penginapen si idarami Jusup ras Maria tupung ia seh i Betlehem? I bas Luk. 2:7 penginapen e iterjemahkan 'Kataluma' ertina ruang tamu atau ruang atas. Biasana rumah-rumah kalak Jahudi lit lantai dasar ras lit ruang atas. Adi lit temue ibaba ku ruang atas, i je fasilitas lengkap guna temue. Paksa si e lit persuruhan pemerintah gelah kerina penduduk isensus, kuta-kuta i sekelewet Jerusalem idemi masyarakat si rehen i kuta dauh nari. Labo saja penginapen si man sewan, rumah-rumah penduduk pe kerina enggo keru itumpangi. Jusup ras Maria pe ndarami rumah-rumah guna itumpangi. Rumah si perpu dina isungkunina, ngaloken ia. Erkiteken lanai siat ingan i ruang atas, iusulkenna gelah Jusuf ras Maria pekesahken i ruang dasar. Situhuna ruangen e la semal ipake apakai guna temue.

Bagem Jusur ras Maria dungna pekesahken i lantai bawah, i je me Maria pekesahken ras bersalin. Labo lit ingan anak e berbaring, e maka ibaluti alu uis ras itamakan i bas pelangkah. Sada pemahamen si mbaru man banta arah keterangan Lukas 2:7 e, maka Jesus tubuh labo i bas karang asuh-asuhen entah i bas penginapen si mewah tapi i rumah lantai dasar (ruang bawah) si labo semal ipake guna temue. Jadi ingan Jesus tubuh e cuku p sederhana, ruang si mesuni, la lit si ngianisa, em ruang si cukup tenang, aman, ras damai. Mari si sikapken pusuh ras rumahta jadi ruang si sederhana man ingan Jesus tubuh, pusuh si teneng, aman ras damai.